

Igitassanik eqqaasarneq pillugu Namminersornerullutik Oqartussat nalunaarutaat

Avatangiisit innarlitsaaliorneqarnissaannik Inatsisartut peqqussutaanni nr. 12-imi 22. december 1988-imeersumi Inatsisartut peqqussutaatigut nr. 7-ikkut 13. maj 1993-imeersukkut allanngortinneqarsimasumi § 1, imm. 1 nr. 4, § 7, imm. 2 nr. 5, § 15 aamma § 46, imm. 2 tunngavigalugit makku aalajangersarneqarput:

Kapitali 1.

Atuuffissai il.il.

§ 1. Nalunaarummi matumani igitassanik eqqaasarnermi immikkut inatsisiliuunneqarsimanngitsumi malittarisassat aalajangersarneqarput.

§ 2. Igitassat suulluunniit eqqagassat aalajangersimasut pillugit nuna tamakkerlugu atuuttuunik immikkut maleruagassiaasut sukkulluunniit atuuttut nalunaarullu manna malillugu kommunalbestyrelsip ilitsersuussineri malillugit eqqarneqartassapput.

§ 3. Illuutilittut isigineqassaaq kinaluunniit nunaminertamik pisortanit tunineqarsimalluniluunniit nunaminertamik nunatamilluunniit atuisinnaatitaasoq. Tamanna nunaminertani sanaartorfineqarsimanngitsuni igitassaqaalerfiusimasumili aamma atuuppoq.

Imm. 2. Aamma illuutilittut isigineqassapput:

- 1) Inissianik inuussutissarsiornermut atorneqartunik, illuutinik inuussutissarsiornermut atorneqartunik nunaminertanillu inuussutissarsiornermut atorneqartunik attartortut atuisullu.
- 2) Inissianik illunillu najugassianik attartortut atuisullu.

Kapitali 2.

Innersuussisussaatitaaneq eqqaasussaatitaanerlu.

§ 4. Illuutilinnut kiisalu suliffeqarfinnut, suliffinnut il.il. igitassanik eqqaviusinnaasumik kommunalbestyrelsi innersuussisaaq. Eqqaavissatut innersuussutigineqartoq atorneqassaaq.

§ 5. Illoqarfinni nunaqarfinnilu tamani igitassanut makkununga eqqaaviusinnaasumik kommunalbestyrelsi pilersitsisaaq:

- 1) igitassanut taakkunungalugu assingusunut,
- 2) qimminut uumasunullu mikinerusunut allanut toqungasunut,
- 3) poortuutissanut ikuallajasunut ikuallajasuunngitsunullu,
- 4) ujaqqanut, issumut, ujaraaqqanut, sanaartornermi atortussanut kifitissanullu allanut, aamma
- 5) saviminikunut.

Imm. 2. Eqqaaneq imatut pisinnaavoq:

- 1) Eqqaaveqarfimmi akuerisaasumi inissiinikkut.
- 2) Ikuallaavimmi akuerisaasumi ikuallaanikkut.
- 3) Nr.I-ip nr. 2-llu akuleriillugit atornerisigut.
- 4) Assigiinngitsutigut atueqqinikkut, imaluunniit qulaani taaneqartut ilaata ataatsip arlalilluunniit akuleriillugit atornerisigut.
- 5) Aaqqissuussineq Naalakkersuisunit akuerisaasoq alla atorlugu.

§ 6. Eqqaaneq suliffeqarfimmit tamakiisumik ilaannakortumilluunniit akuerisaasumit ingerlanneqarpat eqqaanerup kommunalbestyrelsimit ilitersuutigineqartut malillugit ingerlanneqarnera kommunalbestyrelsip nakkutigissavaa.

Imm. 2. Eqqaanermik aaqqissuussinerit kommunimit ingerlanneqanngitsut eqqaaneq pillugu paasissutissanik tamanik tunniusseqqullugit kommunalbestyrelsip naalakkersinnaavai, matumani igitassat kommunip suliffeqarfillu ataasiakkaat katersortitaanit tiguneqartartut suussusii amerlassusiilu ilanngullugit.

Kapitali 3.

Katersuinerit aaqqissuunneqarneri.

§ 7. Sanaartorfusimasuni illoqarfittut nunaqarfittulluunniit isigineqartuni angerlarsimaffinnit igitassanik suliffeqarfinnillu igitassanut assingusunik kommunalbestyrelsi katersuisitsinnaavoq, matumani suliffiit, kantinat sutorniartarfillu ilanngullugit eqqarsaatigalugit.

Imm. 2. Igitassat imm. 1-imi taaneqartut kommunalbestyrelsip nunaminertanit allanit katersortissinnaavai.

Imm. 3. Igitassat isigineqartut tassaapput igitassat angerlarsimaffinni nalinginnaasumik pinngortartut, piniakkanit nammineq nerisassatut pisunit igitassat ilanngullugit.

Imm. 4. Igitassat naatsiivinnersut, igitassat uumasuutinersut aamma eqqagassat annertunerusut igitassanik nalinginnaasumik katersuinnerai ilaatinneqanngillat.

§ 8. Kommunilbestyrelsi illoqarfinni nunaqarfinnilu ukiumut ataasiarluni arlaleriarluniluunniit angerlarsimaffinnit eqqagassanik annertunerusunik igitassanillu kommunip aaqqissuussaanik saliitsinikkut katersorneqarsimasunik katersuisitsinnaavoq, tak. § 17.

§ 9. § 7 imaluunniit 8 tunngavigalugu kommunip aaqqissuussinera aallartinneqarpat, illuutilik, suliffeqarfik, suliffik il.il. sunaluunniit pisussaaffeqarpoq aaqqissuussineq atussallugu, tamatumunngalu akiliutigitinneqartussatut kommunalbestyrelsip aalajangersagaa akilissallugu.

§ 10. Immikkoortortani immikkuullarissuni aamma igitassat nalinginnaasumik eqqarneqartartut katersorneqarnerinik aaqqissuussinerit piumassuseq naapertorlugu peqataaffigineqarsinnaasut kommunalbestyrelsip allartissinnaavai.

Kapitali 4.

Atuisussaatitaaneq.

§ 11. Illuutillit, suliffeqarfiit, umiarsualiviit, suliffiit il.il. pisussaapput eqqavissatut kommunalbestyrelsimit innersuussutigineqartut atussallugit, tak. § 4.

Imm. 2. Imm. 1-imi taaneqartut piumasaqartoqarneratigut uppersarsassavaat igitassaatitik kommunalbestyrelsip innersuussutai malillugit ilumut eqqarneqartartut.

§ 12. Kommunilbestyrelsip suliffeqarfiit umiarsuliviillu naalakkersinnaavai igitassat katitigaaneri pillugit paasissutissanik tamakiisunik tunniusseqqullugit, taamaaliornikkut avatangiisit eqqarsaatigalugit

illersorneqarsinnaasumik eqqaasoqarnera kommunalbestyrelsimit qulakkeerneqarsinnaaqullugu.

Imm. 2. Suliffeqarfiit umiarsualiviillu kommunalbestyrelsip naalakkersinnaavai igitassat passunneqarnerminni eqqarneqarnerminnilu avatangiisinut sunniutaat misissuiffiqullugit.

§ 13. Suliffeqarfiit umiarsualiviillu kommunalbestyrelsip naalakkersinnaavai igitassat immikkoortiteqqullugit, matumani igitassat immikkut ittut inatsisit allat tunngavigalugit eqqarneqartussat immikkoortiterneqarnerat ilanngullugu.

§ 14. Igitassat amerlassusiisa, katitigaanerisa suussusiisaluunniit annertuumik allannguuteqarnernerisigut igitassanik pilersitsisoq tamanna pillugu kommunalbestyrelsimut piaartumik nalunaaruteqassaaq.

Kapitali 5.

Nunaminertanik eqqiluutsuutitsineq.

§ 15. Igitassanik sunilluunniit nunaminertanut namminersortunit pisortanilluunniit pigineqartunut inissiisoqaraniluunniit eqqaasoqassanngilaq.

§ 16. Illuutillit, suliffeqarfiit, umiarsualiviit suliffiillu tamarmik pisussaaffeqarput illuutimik eqqaat illup isuanit sanimut 25 meterit angullugit imaluunniit illumut sanilerisamut ungasissutsip affaa tikillugu akuttunngitsumik saliisarnissamut. Illuutit pinnguartarfillit assigisaannilluunniit atortulersukkat eqqaat illumik piginnittumit aamma salinneqartassapput.

Imm. 2. Kommunalestyrelsen illuutilik aamma naalakkersinnaavaa igitassat pineqartup illuutaaneersut peequllugit.

Imm. 3. Nunaminertat imm. 1-imi aamma 2-mi ilaatinneqanngitsut tamarmik kommunalestyrelsimit salitsinneqartassapput.

Imm. 4. Illoqarfiit nunaqarfiillu iluini nunaminertani tamanit orninneqartartuni eqqaavinnik containerinillu eqqaaviusinnaasunik kommunalestyrelsi ilioqqaatsitsisassaaq.

§ 17. Upernaat tamaasa aputip aattornerata kingorna kommunalestyrelsi kommunimi nunaminertanik ataatsimoortumik inuinnartut pisortatigoortumillu saliinissaq taassuminngalu aallartitsinissaq pillugit nalunaarusiortassaaq.

Imm. 2. Imm. 1 tunngavigalugu kommunalestyrelsip nalunaarutaa ataatsimoortumik saniliinissap qanoq sivistiginissaanik paasissutissanik imaqqassaaq. Saliineq illoqarfimmi nunaqarfinilu immikkoortukkaanut agguataarneqarsinnaavoq.

Imm. 3. Ataatsimoortumik saliineq kommunalestyrelsip piffissaliullugu nalunaarutigisaata iluani ingerlanneqassaaq tunaartarisassat imm. 1-2-mi taaneqartut malillugit.

Imm. 4. Igitassat, eqqagassat annertunerusut taakkulu assigisaat angerlarsimaffinnit katersorneqartut periarfissaq taanna atorlugu kommunalestyrelsip nalunaarutigisaatut aqqusinermut qaninnerpaamut containerimulluunniit eqqaavissatut ilineqarsimasumut inissinneqarsinnaapput.

Kapitali 6.

Aalajangersakkat allat.

§ 18. Kommunimi illoqarfimmi nunaqarfinilu katersuinissamik eqqaanissamillu aqqissuussinerit pillugit maleruqaqusani raalittarisassat erseqqinnerusut kommunalestyrelsimit aalajangersarneqassapput.

Maleruqaqusat paasissutissanik makuninnga imaqqassapput:

1) igitassanut § 5-imi taaneqartutut ittunut eqqaanermut aqqissuussinerit, matumani eqqaavinni ataasiakkaani igitassat suut tiguneqarsinnaanersut, taakkulu sumi inissisimaneri pillugit paasissutissat

ilanngullugit,

2) igitassanut containerit atorineqarnissaat taakkulu sumi inissisimani,

3) kommunimi katersuinissani aqqissuussinerit,

4) ataasiakkaat eqqaavinnik karsinik imaluunniit eqqaavinnik puussialertakkanik ikkuisuinissaminut pisussaaffii pillugit,

5) suliffimmi avatangiisit aamma passussinermi ajornartorsiutit pissutigalugit igitassat eqqarneqarnerini immikkut ittumik malittarisassaasinnaasut, aamma

6) kommunit igitassanik katersisarnermi aqqissuussinerinik igitassanillu eqqagassanik tigooraanernik atuinermi akiliutit.

mm. 2. Maleruaqqusat nammineq piumassuseq naapertorlugu katersinernik aqqissuinnermut tunngasunik aamma imaqartinneqarsinnaapput, tak. § 10.

§ 19. Illup ataatsip igitassaatai karsinut eqqaavinnut, eqqaavinnut puussialertakkanut imaluunniit containerinut eqqaavissianut illup qanitaanut inissinneqarsimasumut imaluunniit illumit atuisumit eqqaavilerisunullu ukioq kaajallallugu tikikkiminartumut inissinneqarsimasunut katersorneqartassapput.

Imm. 2. Kommunalbestyrelsi akuersissutigisinnaavaa karsit eqqaaviit eqqaaviilluunniit puussialertakkat inissinneqarsinnaasut immikkut illuaqqiani assigisaanniluunniit pisortat aqqusiniutaannut qaninnerpaamut imaluunniit pisortat aqqusiniutaasa illullu akorninut inissisimasunut.

Imm. 3. Eqqaaviit karsit, eqqaaviit puussialertakkat containerillu eqqavissiat ilusilersorneqarsimassapput imarisaat qimminit, tulukkanit assigisaannillu suneqarsinnaajunnaarsillugit.

Imm. 4. Igitassanik katersisarnerni aqqissuussinnermut atatillugu kommunalbestyrelsiq maleruaqqusamigut naalakkiutigisinnaavaa eqqaaviit karsit eqqaaviilluunniit puussialertakkat aalajangersimasut atorineqassasut. Eqqaaviit puussialertakkat atorineqarnissaat naalakkiutigineqarpat puussiat katersisarnermi aqqissuussineq aqqutigalugu tunniunneqartassapput.

Kapitali 7.

Nakkutilliineq il.il.

§ 20. Igitassanik uninngatisineq assartuinnerlu peqqinnissakkut avatangiisitigullu illersorneqarsinnaasumik aamma kommunalbestyrelsiq kap. 6 malillugu aalajangersagai malillugit pisassaaq.

§ 21. Igitassat eqqarneqarnissaasa tungaannut igitassat passunneqarneri suulluunniit kommunalbestyrelsimi nakkutigineqassapput.

Imm. 2. Nalunaarummi matumani aalajangersakkat malillugit igitassat passunneqarnissaat eqqarneqarnissaallu qulakkeerniarlugit kommunalbestyrelsiq inerteqquteqarsinnaallunilu naalakkiuteqarsinnaavoq.

Imm. 3. Nakkutilliinnermi malittarisassanillu atortitsinnermi Avatangiisit innarlitsaalineqarnissaannik Inatsisartut peqqussutaanni nr. 12-imi 22. december 1988-imeersumi Inatsisartut peqqussutaatigut nr. 7-ikkut 13. maj 1993-imeersukkut allanngortinneqartumi kap. 4-mi aamma § 44, imm. 2-mi malittarisassat atuupputtaaq.

§ 22. Akornutaasinnaasut pinngitsoortinniarlugit kommunalbestyrelsiq illuutillit, suliffeqarfiutillit, umiarsualiviit, suliffiit il.il. igitassanik uninngatitsineq, toqqortaqarneq, orniguffissat, tunniussineq il.il. pillugit naalakkiuteqarfigisinnaallugillu inerteqquteqarfigisinnaavai.

Imm. 2. Naalakkiuummi ilaatinneqarsinnaapput eqqaavinnik puussialertakkanik karsinilluunniit eqqaavinnik amerlanerusunik pissarseqqusineq, igitassanik isugutattunik immikkut poortueqqusineq allatulluunniit

pooqartitseqqusineq, orniguffinnik aputaajaaqqusineq il.il., eqqaavinnik akulikinnerusumik imaarsisaqqusineq assigisaallu.

§ 23. Nalunaarut manna tunngavigalugu aalajangernerit tamarmik peqqinnissakkut nakkutilliisoqarfimmut ilisimatitsissutigineqartassapput.

Imm. 2. Nalunaarut manna tunngavigalugu maleruaqqusassiornerit allanngortitsinerillu tamarmik Naalakkersuisunut ilisimatitsissutigineqartassapput.

§ 24. Nalunaarut manna malittarisassalluunniit allat taassuminnga tunngavillit tunngavigalugit aalajangiinerit tamarmik Avatangiisit innarlitsaaliorneqarnissaannik Inatsisartut peqqussutaanni nr. 12-imi 22. december 1988-imeersumi Inatsisartut peqqussutaatigut nr. 7-ikkut 13. maj 1993-imeersukkut allanngortinneqarsimasumi kap. 10-mi malittarisassat tunngavigalugit naammagittaalliutigineqarsinnaapput.

Kapitali 8.

Pineqaatissiinermut atortuulersitsinermullu aalajangersakkat.

§ 25. Akiilisinneqarsinnaapput:

1) §§ 4-5-imik, § 9-mik, § 11-mik, §§ 14-15-imik, § 16, imm. 1, 3 aamma 4-mik kiisalu § 17, imm. 1-imik unioqutitsisut,

2) § 6, imm.2, § 12, imm. 1 aamma 2, § 13, § 16, imm. 2, § 19, imm. 4, § 21, imm. 2 aamma § 22, imm. 1 malillugu piumasaqaatinik, naalakkiutinik inerteqqutinilluunniit sumiginnaasut, imaluunniit

3) § 18 tunngavigalugit malittarisassanik aalajangersarneqartunik unioqutitsisut.

§ 26. Aktieselskabi, anpartsselskabi, andelsselskabi assigisaalluunniit unioqutitsisuuppat selskabi akiliisitaasinnaavoq. Namminersornerullutik Oqartussat, kommuni kommunilluunniit ataatsimut ingerlatseqatigiiffiat unioqutitsisuuppat Namminersornerullutik Oqartussat, kommuni kommunilluunniit ataatsimoorlutik ingerlatseqatigiiffiat akiliisitaasinnaavoq.

§ 27. Nalunaarut manna atortuulersinneqarpoq 1. oktober 1993 aallarnerfigalugu.

Imm. 2. Piffissami ikaarsaariarfusumi 31. december 1993-ip tungaanut igitassanik eqqaanermi ileqqoreqqusat manna tikillugu atuuttut atukkallassapput, tamatumalu kingorna atorunnaarsinneqassallutik.

Imm. 3. Kommunalbestyrelsilli ataasiakkaat Naalakkersuisunut innuttaminnullu siumoortumik nalunaaruteqaaqaarlutik kommunimi igitassanik eqqaanermi ileqqoreqqusat imm. 2-mi piffissaliunneqarsimasooq sioqqullugu atorunnaarsissinnaavaat.

Namminersornerullutik Oqartussat, ulloq 17. september 1993.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut